

Ilinniarnertuunngorniarfinni ilinniarnermut ileqqorissaarnermullu malittarisassat pillugit Namminersorlutik Oqartussat nalunaarutaat nr. 10, 23. juli 2012-imeersoq

Ilinniarnertuunngorniarneq pillugu Inatsisartut inatsisaanni nr. 13, 22. november 2011-meersumi § 55, imm. 3 naapertorlugu aalajangersarneqarpoq:

Siunertarisaq, atuutilersitsineq tamanullu saqqummiussineq

§ 1. Ilinniarnertuunngorniarfinni ataasiakkaani ilinniarnermut ileqqorissaarnermullu malittarisassat ilinniarnertuunngorniarfimmi ilinniarnernerup siunertarisaa qulakkiissavaat aammalu ilinniartunut, ilassutaasumik ilinniartitsissutinilu ataasiakkaani pikkorissartut kiisalu ilinniarfimmi sulisunut pitsaasumik avatangiiseqarnissaannut tapeeqataassallutik.

§ 2. Ilinniartut siunnersuisoqatigiivisa aammalu ilinniartitsisut siunnersuisoqatigiivisa tusarniareernerisigut ilinniarnermut ileqqorissaarnermullu malittarisassanik ilinniarfimmi ilinniartunut atuuttunik rektori aalajangersaassaaq.

Imm. 2. Malittarisassat imarissavaat ilinniarnertuunngorniarfiup torersaarnermut ataatsimooqatigiinnermullu malittarisassai, ilinniartut atuartitsinermi suleqataalluarlutik peqataanissaminnut pisussaaffeqarnerat aammalu ilinniartunut ilinniarfiup ilinniarnermut ileqqorissaarnermullu malittarisassaanik malinninngitsunut rektorip qanoq iliuuseqarsinnaaneramik nassuiaat.

Imm. 3. Aammattaaq ilinniartut sumiginnaasut ilinniarfimmit qanoq pineqartarnersut pillugu malittarisassani nassuiaatigineqassaaq.

§ 3. Ilinniarfiup ilinniarnermut ileqqorissaarnermullu malittarisassai ilinniartunit pissarsiarineqarsinnaassapput aammalu ilinniarfiup nittartagaani allassimassallutik. Ilinniarnermut ileqqorissaarnermullu malittarisassat pillugit ilinniarfiup ilinniartut ilisimatissavai aammalu malittarisassat malinneqanngippata tamanna qanoq kinguneqarsinnaanersoq pillugu ilisimatissallugit.

Imm. 2. Ilinniarfiup ilinniarnermut ileqqorissaarnermullu malittarisassai rektorip Naalakkersuisunut ilisimatitsissutitut nassiutissavai.

Atuartitsinermi nalinginnaasumik torersuunissaq atuartitsinernulluapeqataalluarnissaq

§ 4. Ilinniarfiup ilinniarnermut ileqqorissaarnermullu malittarisassaanik malinninnissaminnut ilinniartut pisussaataapput.

Imm. 2. Atuartitsinermi peqataannginnerit tamarmik peqataannginnermut peqqutaasoq apeqqutaatinnagu peqataannginnertut nalunaarsorneqassapput

§ 5. Ilinniartut atuartitsinermi pinngitsooratik peqataasussaaneranni makku atuupput:

- 1) Atuartitsinermi ilinniarfimmi najuunnissamik piumasaqaataaffiusumi peqataaneq.
- 2) Allaffissornermi periutsit atuartitsinermi suleqataalluarluni peqataanerup nalunaarsorneqartarneranut ilinniarfiup atugaanik pinngitsoorani atuinissaq ilinniartunillu attaveqarnissaq.
- 3) Pitsaassutsikkut annertussutsikkullu piumasaqaatinik aalajangersarneqartunik malinnilluni allattariarsornikkut naammassiniagassanik piffissaq eqqorlugu tunniussisarnissaq.
- 4) Piffissani aalajangersimasuni misilitsinnerni, ukiumoortumik misilitsinnerni assigisaannilu peqataaneq.
- 5) Ilinniarnermi takusassarsiornerit, paasisassarsiorluni angalanerit il.il. peqataasut nerisaqarnerinnarmut akileeqataaffigisaat, annerpaamillu ullut-unnuallu aallartittut tamaasa 50 kr.-mik akeqartinneqartut.
- 6) Atuartitsinermi allami, tassunga ilanngullugu namminersortumik suliaqarnermi ungasianillu atuartitsinerup ilarisaatut pilersaaruserneqartumi peqataaneq.
- 7) Iliuseqarnissamik pilersaarummik § 11 naapertorlugu suliarineqartumik malinninnissamut pisussaaffeqarneq.

§ 6. Ilinniartuq najuuttoq innarluuteqarnini allatulluunniit piginnaanikinnini pissutigalugu ilinniartitsissummi ataatsimi arlalinniluunniit suleqataalluarluni peqataasinnaangitsoq qinnuiginninnermigut rektorip aalajangersimasumik naliliinera malillugu atuartitsinerup ilaani peqataaangissinnaavoq. Peqataaanginnissamik qinnuiginninnermut uppersaatsissatut nakorsamit uppersaammik tunniuseqqullugu rektorip ilinniartuq qinnuigisinnaavaa. Aamma tamanna atuuppoq ilinniartunut allanik peqquteqarlutik ilinniartitsissummi ataatsimi arlalinniluunniit atuartitsinermi suleqataalluarlutik peqataasinnaangitsunut kiisalu ilinniartunut timersornermik atuartitsissummi peqataaanginnissamik qinnuiginnittunut.

Imm. 2. Ilinniarfiup ilinniarnermut ileqqorissaarnermullu malittarisassani nalunaarneqassaaq ilinniartuq qanoq ilinikkut nakorsamit uppersaammik piumasaqarfigineqassanersoq. Nakorsamit uppersaammut aningaasartuut ilinniarfimmit akilerneqassaaq.

§ 7. Ilinniartut ataasiakkaat atuartitsinermi peqataanerisa, tassunga ilanngullugu allattariarsorluni naammassiniagassanik tunniussisarnerisa nalunaarsorneqartarnissaat rektorimit qulakkeerneqassaaq.

Imm. 2. Ilinniartut ataasiakkaat ilinniarfiup ilinniarnermut ileqqorissaarnermullu malittarisassaani malittarisassat aalajangersarneqartut malillugit atuartitsinermi namminneq peqataanermik nalunaarsorneqarneranut nakkutilliinissamut oqaaseqaateqarnissamullu periarfissaqartinneqassapput. Nalunaarsuineq ukiumut ilinniarfiusumut ataatsimut atuuttassaaq, taamaattorli tak. imm. 3.

Imm. 3. Pisussaaffinnik annertuumik immikkut sumiginnaasoqartillugu nalunaarsuineq rektorip naliliineratigut ukioq ilinniarfiusoq ataaseq sinnerlugu sivitsorneqarsinnaavoq.

Imm. 4. Takkutinngitsoortarneq, tassunga ilanngullugu allattariarsorluni naammassiniagassanik tunniussinngitsoortarneq killilersimaarniarlugu ilinniartup sumiginnaaneri sapinngisamik siusissukkut qisuariarfigineqartarnissaat rektorimit qulakkeerneqassaaq.

§ 8. Ilinniarfiup ilinniarnermut ileqqorissaarnermullu malittarisassaani annikinnerusumik unioqqutitsisoqarnerani ilinniartuq perorsaaniikkut rektorimit avoqqaarneqarsinnaavoq. Perorsaaniikkut

avoqqaarineq iliuuserisassanut ilaanngilaq, takuuk § 9.

Iliuserisassat iliuuseqarnissamullu pilersaarutit

§ 9. Ilinniartumut ilinniarfiup ilinniarnermut ileqqorissaarnissamullu malittarisassanik malinninngitsumut perorsaaniikkut avoqqaarineq ilinniarfiup rektoriant naammannngitsutut isigineqarpat iliuuserisassat makku atorpeqarsinnaapput:

- 1) Mianersoqqussummik tunisineq
- 2) Aaqqissuussani ingerlataniluunniit aalajangersimasuni peqataaqqusinnginneq.
- 3) Ukiup ilinniarfiusup ingerlanerani piffissani sivikinnerusuni atuartsinermi peqataanngikkallartitsineq.
- 4) Ilinniartitsissutini ataasiakkaani tamaniluunniit ukiumi ilinniarfiusumi pineqartumi klassimi killiffimmi misilitsinnermik naggaserneqarsinnaasuni misilitsinnissamut innersuussineq.
- 5) Ilinniartitsissummi ataatsimi arlalinniluunniit ukiumi ilinniarfiusumi pineqartumi misilitsinnermik naggaserneqartussani misilitsinnissamut innersuunneqarsinnaatitaanermik annaasaqarneq. Ilinniartoq pineqartoq misilitsinnermi ataatsimi arlalinniluunniit peqataagaluarluni klassimi killiffiup tullianut ingerlaqqinnissaa ilinniarfiup rektoriant aalajangerneqarpat ilinniartitsissummi ilinniartitsissutiniluunniit pineqartumi ukiumi tulliuttumi misilitsittoqassaaq.
- 6) Nammineerluni ilinniartussatut innersuussineq.
- 7) Ilinniarnermi anisitaaneq (ilinniarunnaarsitaaneq).

Imm. 2. Imm. 1, nr. 4-7 naapertorlugit aalajangiinerit misilitsinnerit ingerlanneqarnissaanut ukiumoortumik pilersaarutip tamanut saqqummiunneqarnissaani kingusinnerpaamik qaamat ataaseq sioqqullugu aalajangerneqartassapput. Imm. 1, nr. 4 naapertorlugu aalajangiinerni ukiumoortumik inaarutaasumik karakteriliisoqassanngilaq aammalu ilinniartitsissummi pineqartumi ukiumoortumik karakteriliissutaareersut atorunnaassapput.

Imm. 3. Iliuserisaaq aallartinneqarneq naammaginartuullunilu ilinniarfiup ilinniarnermut ileqqorissaarnermullu malittarisassanik unioqutitsinermut sanilliullugu naleqquttuussaaq.

§ 10. § 9, imm. 1, nr. 2-7 malillugit iliuuserisassat aatsaat aallartinneqarsinnaapput rektorip aalajangersimasumik naliliineratigut aammalu allakkatigut siumoortumik mianersoqqussummik tunniussisoqareernerata kingornagut, taamaattorli takuuk immikkoortoq 3.

Imm. 2. Allakkatigut mianersoqqussut ilinniartumut tunniunneqassaaq aammalu ilinniartoq angajoqqaatut oqartussaaffigineqarpat angajoqqaatut oqartussaasumut allakkatut tammatsaaliukkatut nassiunneqarluni. Mianersoqqussut ukiup ilinniarfiusup nutaap aallartinnerani atorunnaassaaq, ukiuni ilinniarfiusumi nutaami ilinniartup ukiup ilinniarfiusup siuliani mianersoqquneqaatigisaminik pissusilersornini ingerlatiinnarpagu atuutiinnassalluni.

Imm. 3. Pisuni immikkut ilungersunaatilinni, tassunga ilanngullugu pigisanik inunnilluunniit annertuumik innarliiniarneq unitsinniarlugu pinaveersaartinniarluguluunniit imaluunniit iliutsinik uteqqinerni allakkatigut ilimasaareqqaarnani iliuuserisassat aallartinneqarsinnaapput.

§ 11. Ilinniartoq § 9 malillugu iliuuseqarfigineqarpat iliuuseqarnissamut pilersaarummik suliarinnittoqarnissaanik ilinniartoq piumasaqarsinnaavoq, tassuunakkut ilinniartoq pissusilersornermi

iliuseqarnermik kinguneqaataasup allanngortinnissaanut ilitsersorneqarlunilu tapersersorneqassalluni. Ilinniarfik ilinniartoq, angajoqqaatut oqartussaaffigineqarpat taassuma angajoqqaatut oqartussaasui suleqatigalugit iliuseqarnissamut pilersarusiussaaq.

Ilinniartitsissutini ataasiakkaani pikkorissartut il.il.

§ 12. Nalunaarut pikkorissartunut ilinniartitsissutini ataasiakkaani ilinniartinneqartunut assinganik atuutissaaq, ilinniartitsissutinili ataasiakkaanut pissutsinik immikkut ittunik tunngavilersorneqartunut atuutissanani.

§ 13. Nalunaarut ilinniarnertuunngorniarfimmi ilassutitut pikkorissarnerni pikkorissartunut assinganik atuutissaaq, pikkorissartunut taakkununnga pissutsinut immikkut atugassaritinneqartunut atuutissanani.

Illuatungerisanut tusarniaaneq naammagittaalliornerlu

§ 14. Nalunaarut manna naapertorlugu rektorip aalajangigai pisortat ingerlatsineranni inatsisit malillugit aalajangiinerupput.

Imm. 2. § 9, imm. 1 naapertorlugu iliuseqarnissamik aatsaat aalajangiisoqarsinnaavoq ilinniartoq ilinniartorlu angajoqqaatut oqartussaaffigineqarpat taassuma angajoqqaatut oqartussaasui piffissaqartitsilluarluni tusarniaaffigineqarsimappata. Tusarniaanerup tiguisissamut nalunaarutigineqarneranit tusarniaanermut akissuteqarnissamut piffissarititaq ullunit marlunnit sivikinnerussanngilaq, taamaattorli tak. § 10, imm. 3.

§ 15. Nalunaarut manna malillugu rektorip aalajangigai ilinniartumit imaluunniit ilinniartoq angajoqqaatut oqartussaaffigineqarpat taassuma angajoqqaatut oqartussaasuinit nalunaarutip nalunaarutigineqarneranit sapaatip akunneri marluk qaangiutsinnagit Ilinniartitaanermut Naalackersuisoqarfimmut naammagittaalliuutigineqarsinnaapput.

Imm. 2. Naammagittaalliuut allaganngorlugu ilinniarfimmi rektorimut tunniunneqassaaq, rektorip suliameq nammineq oqaaseqaatini ilanngullugit naammagittaalliuut Ilinniartitaanermut Naalackersuisoqarfimmut ingerlateqqissallugu. Suliameq ingerlateqqinneqannginnerani rektorip naammagittaalliuuteqartoq sapaatip akunnerata ataatsip ingerlanerani oqaaseqaammut oqaaseqaateqarnissamut periarfississavaa. Naammagittaalliuuteqartup oqaaseqaatigisinnaasai Naalackersuisoqarfimmut ilanngullugit nassiuunneqassapput.

Imm. 3. Ilinniarfimmi rektori pisunilu immikkut ittuni Naalackersuisoqarfik tamanna pillugu aalajangiitinnagit § 9, imm. 1 naapertorlugu iliuserisassanngortinneqartut pillugit naammagittaalliuutit atuukkunnaarallartinneqarsinnaanngillat.

Atuutilerfissaq ikaarsaariarnermilu aalajangersakkat

§ 16. Nalunaarut ulloq 1. august 2012 atuutilerpoq.

Imm. 2. Ilinniarnermut ileqqorissaarnermullu malittarisassat piffissami nalunaarutip atuutilernerani ilinniarfinni ataasiakkaani atuutsinneqartut atuutiinnassapput nalunaarut manna tunngavigalugu ilinniarnermut ileqqorissaarnermullu malittarisassanit nutaanit taarserneqarnissamik tungaanut.

Imm. 3. Ilinniarnermut ileqqorissaarnermullu maleruaqqusanik atuuttunik nutarterineq kiisalu § 2, imm. 1 aamma § 3, imm. 1-2 naapertorlugit tusarniaaneq tamanullu saqqummiussineq ullup nalunaarutip matuma atuutilerfiata kingorna kingusinnerpaamik qaammatit marluk kingorna ingerlanneqassapput.

Kalaallit Nunaanni Namminersorlutik Oqartussaq, ulloq 23. juli 2012

Palle Christiansen

/

Mikael Kristensen